

Newspaper	Utusan Malaysia
Date	30 September 2015

Malaysia perlu kekalkan momentum ekonomi

NEW YORK 29 Sept. - Malaysia perlu mengekalkan momentum pertumbuhan ekonomi sekitar enam peratus yang dicatatkan sekarang bagi memastikan matlamatnya menjadi negara berpendapatan tinggi dapat dicapai menjelang tahun 2020.

Perdana Menteri, Datuk Seri Najib Tun Razak yang percaya sasaran tersebut akan dapat direalisasikan menyifatkan Malaysia berada di jajaran yang betul untuk mencapai wawasan itu sungguhpun situasi ekonomi semasa tidak menentu. "Apa yang kita perlu buat ialah kita kena sentiasa bersedia untuk berhadapan dengan keadaan yang berubah dan kejutan luar yang berada di luar kawalan kita.

"Kita mesti terus mengekalkan momentum kita yang bergerak ke hadapan," katanya pada mesyuarat tahunan Majlis Penasihat Sains dan Inovasi Global (GSIAC) kelima di Hotel Marriot East Side di sini semalam.

GSIAC ditubuhkan atas inisiatif Najib pada tahun 2011 dengan antara pengasasnya ialah bekas Duta Malaysia ke Amerika Syarikat, Allahyarham Tan Sri Dr. Jamaluddin Jarjis yang meninggal dunia dalam nahas helikopter di Malaysia pada 4 April lalu.

Fungsinya adalah untuk bekerjasama dengan tokoh-tokoh sains Amerika Syarikat dan antarabangsa bagi mentransformasikan ekonomi Malaysia dan memberinya suatu lompatan kuantum melalui projek-projek bersama dalam bidang sains dan inovasi.

Antara tokoh bidang sains yang turut hadir dalam mesyuarat bersama Perdana Menteri di New York semalam ialah Profesor Joseph D. Brain dari Universiti Harvard dan T.C. Westcott, Ketua Pegawai Eksekutif Akademi Sains New York. GSIAC disertai oleh barisan tokoh sains, industri dan korporat dari Malaysia dan antarabangsa.

Mesyuarat tahunan GSIAC itu antara lain dihadiri Penasihat Sains kepada Perdana Menteri, Tan Sri Zakri Abdul Hamid; Menteri Sains, Teknologi dan Inovasi, Datuk Madius Tangau; Menteri Pendidikan Tinggi, Datuk Seri Idris Jusoh; Men-



NAJIB TUN RAZAK bergambar bersama para saintis sebelum bermula mesyuarat tahunan Majlis Penasihat Sains dan Inovasi Global (GSIAC) kelima di New York, kelmarin. Turut hadir, Zakri Abdul Hamid (dua dari kanan), T.C. Westcott (dua dari kiri) dan Idris Jusoh (kiri). - BERNAMA

teri di Jabatan Perdana Menteri, Senator Datuk Seri Abdul Wahid Omar dan Menteri Besar Johor, Datuk Seri Mohamed Khaled Nordin.

Dalam mesyuarat itu yang diadakan sempena lawatan kerja Perdana Menteri ke Pertubuhan Bangsa-Bangsa Bersatu (PBB), Najib memberitahu GSIAC bahawa kesejahteraan negara dan kebajikan rakyat sentiasa menjadi keprihatinan dan keutamaannya.

Najib berkata, laluan untuk Malaysia mencapai sepenuhnya status negara maju tidak selalunya lancar

dan mudah serta penuh cabaran.

"Walaupun kita hidup pada zaman inovasi teknologi yang hebat, dengan pendapatan tinggi dan peluang yang bertambah, kita masih lagi tertakluk kepada faktor ekonomi global yang sukar diramalkan yang kita tidak dapat mengawalinya.

"Situasi ekonomi semasa yang meruap yang kita hadapi di Malaysia dan seluruh dunia sekarang adalah salah satu contohnya," kata beliau.

Menurut Perdana Menteri, model pertumbuhan Malaysia telah memberikan hasil yang cemerlang

tetapi ia dicapai sebahagiannya kerana faktor sikap.

"Kita mencapai semua kejayaan itu kerana kita sanggup menilai prestasi kita dengan cara terbuka dan telus, dan membuat penyesuaian apabila keadaan memerlukan," katanya.

Malaysia, tegas Najib, sentiasa cuba mengimbangi antara ekonomi modal dan ekonomi rakyat, antara pengurusan ekonomi daripada perspektif makro dan ekonomi berorientasikan rakyat seperti kos sara hidup, pendapatan isi rumah dan lain-lain tema ekonomi.

Perdana Menteri percaya bahawa dari segi perspektif teoritikal, ekonomi modal dan ekonomi rakyat tidak dapat dipisahkan dan ia wujud dalam satu hubungan simbiotik.

Katanya, Malaysia telah memberi penekanan kepada kedua-dua aspek ekonomi itu dalam program ekonomi lima tahun Rancangan Malaysia Kesebelas (RMK-11) bertemakan Pertumbuhan Berpaksikan Rakyat dengan peruntukan RM260 bilion yang dibentangkan pada Mei lalu.

- UTUSAN